

17 Cuntais Ghníomhaireacht Bainistíochta an Chisteáin Náisiúnta

- 17.1** Éilítear in Alt 12 den Acht um Ghníomhaireacht Bainistíochta an Chisteáin Náisiúnta, 1990 (an tAcht) ar Ghníomhaireacht Bainistíochta an Chisteáin Náisiúnta (an NTMA) cuntais a choimeád de gach airgead a fhaigheann sé nó a chaitheann sé san fhoirm atá ceadaithe ag an Aire Airgeadais, agus iad a chur isteach i gcomhair iniúchta ag an Ard-Reachtair Cuntas agus Ciste. Tar éis dó an t-iniúchadh sin a chur i gcrích, ní mór don NTMA na cuntais a chur isteach chuig an Aire, agus ní mór don Aire ansin na cuntais a chur faoi bhráid Thithe an Oireachtais.
- 17.2** Mar rud ar leithligh, éilíonn an tAcht ar an Ard-Reachtair Cuntas agus Ciste tuairisc a thabhairt do Dháil Éireann maidir le cruinneas na méideanna a thugann an NTMA sna cuntais gach bliain. Seo í an tuarascáil le haghaidh 2013 faoin alt sin den Acht.


Cuntais an NTMA 2013

- 17.3** Rinneadh iniúchadh ar chuntais an NTMA le haghaidh 2013. Eisíodh mo thuarascálacha maidir leis na hiniúchtaí i mí an Mheithimh 2014. Chuir an tAire cóipeanna de na cuntais, mar aon le mo thuarascálacha ar na hiniúchtaí, faoi bhráid Thithe an Oireachtais an 28 Iúil 2014.
- 17.4** Táim sásta go dtugann na cuntais léargas ceart ar idirbhearta an NTMA le haghaidh 2013 agus ar a cuid iarmhéideanna ag deireadh na bliana.
- 17.5** Is mar seo a leanas atá na cuntais a ndearnadh iniúchadh orthu faoi Alt 12 den Acht (arna leasú)
- Fiachas Náisiúnta na hÉireann
 - Cuntas riaracháin Ghníomhaireacht Bainistíochta an Chisteáin Náisiúnta
 - Ráitis airgeadais Chiste Bhanc Taisce an Phoist
 - Ráitis airgeadais na Gníomhaireachta um Éilimh ar an Stát
 - Cuntas an Chúlchiste Mionchoigiltis.
- 17.6** I gcomhréir le hAlt 12 den Acht (arna leasú), is gá taifead a lua i gcuntais an NTMA de chostais arna dtabhú aige maidir leo seo a leanas
- An Cúlchiste Náisiúnta Pinsean
 - An Ghníomhaireacht Airgeadais d'Fhorbairt Náisiúnta
 - An Ghníomhaireacht Náisiúnta um Bainistíocht Sócmhainní.

Feidhmeanna, Róil agus Foirne an NTMA

- 17.7** Is eagraíocht ilghnéitheach í an NTMA agus is iomaí feidhm agus ról atá aici a théann níos faide anois ná feidhm bhunaidh na heagraíochta fiachas náisiúnta na hÉireann a bhainistiú. Tá achoimre de phríomhfeidhmeanna agus róil an NTMA leagtha amach i Fíor 17.1.

Fíor 17.1 Príomhfeidhmeanna agus Róil Ghníomhaireacht Bainistíochta an Chisteáin Náisiúnta



Foinse: Ghníomhaireacht Bainistíochta an Chisteáin Náisiúnta

Nótaí: a Ullmhaítear ráitis airgeadais ar leithligh le haghaidh gach ceann de na comhlachtaí/feidhmeanna sin.

b I gcás maoiniú Stáit agus seirbhísí bainistiú fiach agus bainistíochta cistíochta, ullmhaítear ráitis airgeadais ar leithligh le haghaidh Chiste na gCuntas Díomhaoin, an Chúlchiste Mionchoigiltis, Chiste Bhanc Taisce an Phoist, Chuntas Fuascailte Seirbhísí Caipitiúla agus an Fhiachais Náisiúnta.

Maoiniú, Fiachas agus Bainistiú Cisteáin


- 17.8** Faigheann an NTMA iasachtaí thar ceann an Stáitchiste agus bainistíonn sé fiachas náisiúnta na hÉireann. Ag deireadh 2013, ba ionann é sin agus €173.9 billiún (2012: €137.6 billiún) tar éis airgead tirim agus sócmhainní airgeadais eile a chur san áireamh.
- 17.9** Tá sonraí maidir le struchtúr an fhiachais náisiúnta áirithe i gcaibidil 2 ina ndéileáiltear leis na treochtaí i bhfiachas an Rialtais.

17.10 Comhlíonann an NTMA roinnt feidhmeanna bainistiú fiach eile agus cisteáin, lena n-áirítear

- oibríochtaí cistíochta don Ghníomhaireacht Náisiúnta um Bainistíocht Sócmhainní (NAMA), don Chúlchiste Náisiúnta Pinsean (NPRF) agus do Chorpáraid na hÉireann um Réiteach Bainc Teo (i leachtú speisialta) (IBRC)
- lárshuibhís cistíochta á soláthar do chomhlachtaí Stáit agus d'údaráis áitiúla
- sócmhainní Chiste na gCuntas Díomhaoín agus Ciste Bhanc Taisce an Phoist á mbainistiú
- formhaoirsiú ar an gCúlchiste Mionchoigiltis agus an Cuntas Fuascailte Seirbhísí Caipitiúla.¹

Scéimeanna Ráthaíochta Institiúidí Airgeadais**17.11** Faoi Scéim um Fhorais Chreidmheasa (Ráthaíocht Dlíteanas Incháilithe) 2009 déanann an tAire ráthú ar dhlíteanas incháilithe áirithe, lena n-áirítear earlaisí agus urrúis fiachais lena ngabhann suas le cúig bliana aibíochta i bhforais rannpháirteacha. Cheap an tAire Airgeadais an NTMA mar oibreoir na scéime.² Ina theannta sin, rinne an tAire na feidhmeanna seo a leanas a tharmligean chuig an NTMA in 2013³

- fíorú na n-éileamh ar íocaíocht maidir le gníomhas ráthaíochta a rinneadh an 29 Samhain 2010 maidir le conarthaí díorthacha a rinne an IBRC
- íocaíocht méideanna dlite faoi ngníomhas ráthaíochta.

17.12 Tá táille iníochta ag gach institiúid rannpháirteach a bhfuil dlíteanas ráthaithe acu. Tá Oifigeach Cuntasaíochta na Roinne Airgeadais freagrach as na táillí a fháigear.**17.13** Ar an 26 Feabhra 2013, d'fhógair an tAire go rabhthas chun deireadh a chur leis an scéim i dtaca le gach dlíteanas nua le héifeacht ó mheán oíche an 28 Márta 2013. Bhí €74.6 milliún cumhdaithe ag an scéim nuair a dúnadh é (féach Fíor 17.2).**Fíor 17.2** Dlíteanas atá cumhdaithe faoi Scéim Ráthaíocht Dlíteanas Incháilithe, 2010 – 2014

¹ Tuarascáil an iniúchta ar Chuntas Fuascailte Seirbhísí Caipitiúla arna n-iniúchadh faoi alt 22 d'Acht Airgeadais, 1950, arna eisiúint an 28 Meitheamh 2014.

² Ionstraim Reachtuil Uimh. 490 de 2009.

³ Ionstraim Reachtuil Uimh. 85 de 2013.

- 17.14** Rinneadh roinnt éileamh faoin scéim tar éis leachtú IBRC i mí Feabhra 2013. Ba ionann iomlán na n-íocaíochtaí éilimh ag 31 Nollaig 2013 agus €998 milliún (€934 milliún le haghaidh bannaí agus €64 milliún le haghaidh éarlaisí). Ba ionann agus €61 milliún na híocaíochtaí maidir le héarlaisí IBRC le haghaidh na chéad sé mhí de 2014.¹
- 17.15** Ag 31 Nollaig 2013, bhí íocaíochtaí arna dtreorú ag díorthaigh arbh fhiú €37.5 milliún ar an iomlán iad déanta freisin ag an NTMA mar thoradh ar leachtú IBRC. Tá gach dliteanas faoi ghníomhas ráthaíochta an IBRC socraithe anois.

Bainistíocht an Chiste Carbóin

- 17.16** Riarann an NTMA ceannach creidmheasanna carbóin a theastaíonn chun oibleagáidí athraithe aeráide na hÉireann a chomhlíonadh tríd an gCiste Carbóin, a bunaíodh leis an Acht um an gCiste Carbóin 2007. Mar sin féin, tá ceannach creidmheasanna carbóin curtha ar fionraí ó mhí Feabhra 2009 i leith. Ag deireadh 2013, bhí sócmhainní á sealbhú sa Chiste Carbóin arbh fhiú €99 milliún iad le héadail (2012: €99 milliún).
- 17.17** Tugtar cuntas ar leithligh ar an gCiste Carbóin agus níl sé ina chuid de chuntais an NTMA chun críche alt 12 den Acht (arna leasú). Déantar iniúchadh ar ráitis airgeadais an Chiste Carbóin faoin Acht um an gCiste Carbóin 2007.²

An Ghníomhaireacht um Éilimh ar an Stát

- 17.18** Bainistíonn an NTMA éilimh ar chúiteamh de bharr díobháil phearsanta, damáiste maoine agus faillí chliniciúil thar ceann údaráis Stáit áirithe. Nuair a chomhlíonann sé na feidhmeanna sin, tugtar an Ghníomhaireacht um Éilimh ar an Stát ar an NTMA (SCA). Mheas an NTMA go gcosnódh sé €1.2 billiún na héilimh a bhí fós le hóc ag 31 Nollaig 2013 (2012: €1.1 billiún) a shocrú.
- 17.19** Bhí luach díreach faoi bhun €140 milliún (2012: €100 milliún) sna dámhachtainí agus costais éilimh ghaolmhara an SCA in 2013. Bhíothas in ann na costais sin a fhorchúiteamh ó na húdaráis Stáit ábhartha a bhaineann leas as seirbhísí an SCA. Ina theannta sin, thabhaigh an NTMA €11.5 milliún i gcostais riaracháin agus é ag cur a chuid feidhmeanna SCA i gcrích. Tá na costais riaracháin sin áirithe i gcostais riaracháin an NTMA agus cuirtear chun dochair an Lárchiste iad.

NewERA

- 17.20** Bunaíodh an tÚdarás um Gheilleagar Nua agus um Théarnamh (NewERA) an chéad lá riamh laistigh den NTMA ar bhonn neamhreachtuil i ndiaidh fógra Rialtais i mí Mheán Fómhair 2011.
- 17.21** Bhain an caiteachas a thabhaigh an NTMA in 2013 maidir le feidhmeanna NewERA go príomha le cur ar fáil agus/nó le soláthar³
- comhairle airgeadais agus thráchtála don Rialtas maidir le diúscairt bheartaithe shócmhainní an Stáit, lena n-áirítear díol ghnó Fuinnimh Bhord Gáis ag Ervia (Bord Gáis Éireann roimhe seo)
 - comhairle maidir le hairgeadas agus rialachas corparáideach i dtaca le rialú agus gnéithe airgeadais agus tráchtála comhlachtaí/sócmhainní Stáit áirithe
 - comhairle i dtaca le gníomhaíochtaí d'fhothann infheistíocht i mbonneagar eacnamaíoch a éascú.

¹ Cé gurb é an NTMA a phróiseáil na híocaíochtaí, tugtar léiriú orthu sna Cuntais Airgeadais.

² Eisíodh an tuarascáil maidir leis an iniúchadh ar an gCiste Carbóin an 27 Meitheamh 2014.

³ Ní dhéantar nochtadh ar leithligh ar chostais fheidhmeanna NewERA i gcuntas riaracháin an NTMA.

17.22 Bunófar feidhmeanna NewERA ar bhonn reachtúil leis an Acht um Ghníomhaireacht Bainistíochta an Chisteáin Náisiúnta (Leasú) 2014.¹ Áireofar leis na feidhmeanna sin soláthar seirbhísí comhairleacha airgeadais agus tráchtála do Aire Rialtais iomchuí i dtaca le comhlacht ainmnithe faoina shainchúram/sainchúram nó i dtaca le haon chomhlachtaí nó sócmhainní sealbhaithe eile.² Coimeádfaidh na hAire iomchuí a gcuid freagrachtaí reatha agus a scairshealbhú i gcomhlachtaí den sórt sin. Cumhdóidh na seirbhísí comhairleacha airgeadais agus tráchtála (inter alia) na nithe seo a leanas

- cleachtadh ceart a bhaineann le scaireanna arna sealbhú ag Aire iomchuí i gcomhlacht ainmnithe
- rialachas corparáideach
- oibriúchán airgeadais agus tráchtála
- luach aon leasa arna shealbhú a chosaint, a fheabhsú nó a réadú
- straitéis chorparáideach agus pleananna caipitil agus infheistíochta
- éadálacha, diúscairtí, atheagrú agus athstruchtúrú
- ceapachán agus luach saothair an chathaoirligh, comhaltaí, stiúrthóirí nó an phríomhfheidhmeannaigh.

17.23 Féadfaidh NewERA freisin, i gcomhairle leis na hAire Rialtais, tograí a fhorbairt le haghaidh infheistíochta i bpríomhearnálacha bonneagair eacnamaíocha ar leith d'fhonn tacú le gníomhaíocht eacnamaíoch agus fostaíocht.

Foireann le haghaidh Fheidhmeanna an Chórais Baincéireachta

17.24 I mí an Mhárta 2010, tharmligean an tAire feidhmeanna áirithe den chóras baincéireachta don NTMA.³ Bhain an tarmligean, go háirithe, le bainistiú leas an Stáit sna hinstiúidí creidmheasa atá cumhdaithe ag na ráthaíochtaí bainc agus caibidlíocht maidir le tacaíocht chaipitil do na hinstiúidí sin. Rinneadh an tarmligean a aisghairm i mí Lúnasa 2011⁴ agus tá Aonad Baincéireachta an NTMA curtha ar iasacht chuig an Roinn Airgeadais ó shin i leith.

17.25 Ar threoir ón Aire, leanann an NTMA ag seasamh costais an Aonaid Bhaincéireachta, ina gcuimsítear costais foirne agus costais chomhairleoireachta áirithe. Ní thugtar nochtadh ar leithligh i gcuntas riaracháin an NTMA de leibhéal na gcostas a tabhaíodh nó sa nóta seirbhísí a bhaineann le Vóta 7 Oifig an Aire Airgeadais.

An Cúlchiste Náisiúnta Pinsean

17.26 Is é an NTMA Bainisteoir an Chúlchiste Náisiúnta Pinsean (NPRF). Ceadáítear leis an saindualgas reachtúil atá ag an NPRF don Aire Airgeadais ordú a thabhairt don Choimisiún NPRF chun infheistíochtaí áirithe agus íocaíochtaí áirithe a dhéanamh leis an Státchiste.⁵ Bhí glansócmhainní de €19.9 billiún i seilbh an NPRF ag deireadh 2013. Cuimsíodh sna glansócmhainní €6.8 billiún sa phunann lánroghnach agus €13.1 billiún sa phunann infheistíochtaí ordaithe.⁶

17.27 Thabhaigh an NTMA costais €3.9 milliún ina ról mar Bhainisteoir an Chiste. Nochtar é sin i gcuntas riaracháin an NTMA ach ní fhaigheann an NTMA ar ais é.

1 Achtaithe i mí Iúil 2014. Tiocfaidh an tAcht i bhfeidhm le hOrdú Aireachta an Aire Airgeadais.

2 Faoi láthair, is iad na comhlachtaí ainmnithe Bord Soláthair an Leictreachais, Ervia, Bord na Móna cpt, Coillte Teoranta, Eirgrid cpt, Uisce Éireann agus aon fhochuideachta nó aon chuideachta ina bhfuil leas ag comhlacht ainmnithe den sórt sin.

3 Ionstraim Reachtúil Uimh. 115 de 2010.

4 Ionstraim Reachtúil Uimh. 395 de 2011.

5 An tAcht um Chúlchiste Náisiúnta Pinsean, 2000.

6 Eisíodh an tuarascáil maidir leis an iniúchadh ar an NPRF an 28 Meitheamh 2014.

- 17.28** Foráiltear leis an Acht um Ghníomhaireacht Bainistíochta an Chisteáin Náisiúnta (Leasú) 2014 go mbunófar Ciste Infheistíochta Straitéisí na hÉireann (ISIF) a iompróidh sócmhainní an NPRF. Cuirfear na cistí i bpunann lánroghnach an NPRF ar fáil le haghaidh infheistíochta ar bhonn tráchtála ar bhealach a bheidh deartha chun tacú le gníomhaíocht eacnamaíoch agus le fostaíocht sa Stát.

An Ghníomhaireacht Airgeadais d'Fhorbairt Náisiúnta

- 17.29** Is í an Ghníomhaireacht Airgeadais d'Fhorbairt Náisiúnta (NDFA) an comhairleoir airgeadais reachtúil atá ag údaráis Stáit maidir le gach togra infheistíochta poiblí a bhfuil luach os cionn €20 milliún ag gabháil leo. Tá sé freagrach freisin as soláthar tograí comhpháirtíochta príobháidí/poiblí in earnálacha seachas iompar agus sna húdaráis áitiúla agus as soláthar díreach tograí oideachais áirithe.
- 17.30** Comhlíonann an NDFA a chuid feidhmeanna tríd an NTMA. Ba ionann agus €5.7 milliún na táillí agus na costais a thabhaigh an NDFA i gcomhlíonadh a chuid feidhmeanna airgeadais agus comhairleacha in 2013. Bhíothas in ann na costais sin a fhorchúiteamh ó na húdaráis Stáit ábhartha a bhaineann leas as seirbhísí an NDFA. Thabhaigh an NTMA €7.1 milliún breise i gcomhlíonadh a chuid feidhmeanna eile i dtaca leis an NDFA. Nochtar é sin i gcuntas riaracháin an NTMA ach ní fhaigheann an Ghníomhaireacht ar ais é.¹

An Ghníomhaireacht Náisiúnta um Bainistíocht Sócmhainní

- 17.31** Shann an NTMA foireann agus sholáthair sí seirbhísí don Ghníomhaireacht Náisiúnta um Bainistíocht Sócmhainní (NAMA) le linn 2013 lenar tabhaíodh costas €40.8 milliún (2012: €36.9 milliún) agus gearradh in athuair ar NAMA é.²
- Tabhaíodh €33.6 milliún (2012: €30.2 milliún) maidir le costais foirne. Cuimsíodh leis sin €31.1 milliún le haghaidh foireann a bhí fostaithe díreach ag an NTMA agus sannta ar NAMA (331 an 31 Nollaig 2013), agus €2.5 milliún maidir le costas cionroinnte fostaithe an NTMA a bhí ag feidhmiú seirbhísí comhroinnte lena n-áirítear TF, acmhainní daonna agus airgeadas.
 - €7.2 milliún maidir le costais eile a thabhaigh an NTMA, lena n-áirítear cíos, seirbhísí oifige agus costais chomhairleoireachta.³

¹ Eisíodh an tuarascáil maidir leis an iniúchadh ar an NDFA an 27 Meitheamh 2014.

² Ba é iomlán chostais riaracháin NAMA ná €124 milliún in 2013 (€119 milliún in 2012).

³ Féach ráitis airgeadais NAMA 2013. Eisíodh an tuarascáil maidir leis an iniúchadh ar NAMA an 9 Bealtaine 2014.

Leithdháileadh Foirne an NTMA

- 17.32** Leanann líon na foirne san NTMA ag ardú mar thoradh ar fhreagrachtaí breise a bheith tugtha don NTMA. Ag deireadh 2013, bhí 657 duine fostaithe (2012: 500). Tá sannadh na foirne chuig na feidhmeanna éagsúla san NTMA ag deireadh-2012 agus 2013 leagtha amach i Fíor 17.3.

Fíor 17.3 Leithdháileadh foirne an NTMA ag deireadh na Nollag 2012 agus 2013

	2012	2013
Réimsí cláir		
Maoiniú agus bainistiú fiach	14	15
An Ghníomhaireacht um Éilimh ar an Stát	69	77
NewERA	12	13
Aonad Baincéireachta ^a	12	14
An Cúlchiste Náisiúnta Pinsean	13	15
An Ghníomhaireacht Airgeadais d'Fhorbairt Náisiúnta	44	52
An Ghníomhaireacht Náisiúnta um Bainistíocht Sócmhainní	224	331
Seirbhísí tacaíochta		
Airgeadas, Teicneolaíocht agus Riosca	74	98
AD agus Seirbhísí Corparáideacha	8	10
Dlí, Rialú agus Comhlíonadh	16	18
Eile	14	14
Iomlán	500	657

Foinse: Gníomhaireacht Bainistíochta an Chisteáin Náisiúnta


Nóta: a Ar iasacht chuig an Roinn Airgeadais.

Struchtúr an NTMA

- 17.33** Tuairiscíonn Príomhfheidhmeannach an NTMA go díreach don Aire. Feidhmíonn an NTMA faoi láthair gan bord agus tá Coiste Comhairleach aici chun cabhair agus comhairle a thabhairt ar chúrsaí a chuireann an NTMA ar aghaidh chuig an gCoiste.
- 17.34** Mar a tugadh le fios níos túisce, tá foráil san Acht um Ghníomhaireacht Bainistíochta an Chisteáin Náisiúnta (Leasú) 2014 chun athstruchtúrú a dhéanamh ar fheidhmeanna an NTMA. Beartaíonn sé freisin struchtúr rialachais chorpáraidigh athbhreithnithe a chur i bhfeidhm don NTMA agus Bord nua uileghabhálach a bhunú. Anuas ar a feidhmeanna reatha, beidh an NTMA freagrach go díreach as ISIF agus NewERA, agus as feidhmeanna an NDFA. Leis sin déanfar an Coimisiún NPRF agus Bord an NDFA a dhíscaoileadh. Má táthar chun na seirbhísí a atheagrú beidh gá athstruchtúrú a dhéanamh ar na ráitis airgeadais agus ar na cuntais.
- 17.35** Foráiltear san Acht um Chorpáraid Baincéireachta Straitéiseach na hÉireann 2014 go ndéanfar Corparáid Baincéireachta Straitéiseach na hÉireann a fhoirmiú a chuirfidh creidmheas ar fáil laistigh den Stát.¹ Sannfaidh an NTMA foireann agus cuirfidh sí seirbhísí áirithe ar fáil do Chorpárid Baincéireachta Straitéiseach na hÉireann. Mar sin féin, is aonán dlíthiúil ar leithligh í an chorpárid den NTMA.
- 17.36** Tá feidhmeanna agus ról athbhreithnithe an NTMA, i ndiaidh na leasuithe sin, tugtha i Fíor 17.4.

¹ Achtaithe agus tosaithe i mí Iúil 2014.

Fíor 17.4 Feidhmeanna agus ról athbhreithnithe Gníomhaireacht Bainistíochta an Chisteáin Náisiúnta



Foinse: Gníomhaireacht Bainistíochta an Chisteáin Náisiúnta

- Nótaí:
- a Ullmhófar ráitis airgeadais ar leithligh le haghaidh gach ceann de na comhlachtaí/feidhmeanna sin.
 - b I gcás maoiniú Stáit agus seirbhísí bainistiú fiach agus bainistíochta stáitchiste, ullmhófar i gcónaí ráitis airgeadais ar leithligh le haghaidh Chiste na gCuntas Díomhaoin, an Chúlchiste Mionchoigiltis, Chiste Bhanc Taisce an Phoist, Chuntas Fuascailte Seirbhísí Caipitiúla agus an Fhiachais Náisiúnta.
 - c An Cúlchiste Náisiúnta Pinsean roimhe seo. Leanfar ag ullmhú ráitis airgeadais don NPRF go dtí go n-aistreofar gach sócmhainn chuig Ciste Infheistíochta Straitéisí na hÉireann.

Conclúid

- 17.37** Tá an NTMA tagtha chun cinn mar eagraíocht chuimsitheach a dhéanann tuairisciú airgeadais chuimsitheach dá réir sin, agus tá difríocht sa leibhéal nochta maidir le costais na seirbhísí agus feidhmeanna éagsúla atá faoi shainchúram an NTMA. I roinnt cásanna, nochtar sna ráitis airgeadais costais iomlána na seirbhísí aonair agus na réimsí feidhmiúla. I gcásanna eile, ní nochtar costais iomlána. Níl sé sin ag teacht leis an ngnás ina bhfuiltear ag díriú níos mó agus níos mó i dtreo cuntasáocht clár-bhunaithe i dtaca le seirbhísí poiblí.
- 17.38** Déanfar atheagrú substaintiúil agus atreorú ar fheidhmeanna le hAcht 2014, agus beidh impleachtaí móra aige sin ar raon agus ar leagan amach na ráiteas airgeadais. Tugann sé sin deis don NTMA deireadh a chur le haimhrialtachtaí agus a tuairisciú airgeadais a shruthlíniú.

Moladh 17.1

I gcomhthéacs athfhormáidiú ráitis airgeadais an NTMA, ba chóir cur chuige leanúnach a ghlacadh maidir le nochtadh na gcostas foriomlán a bhaineann le gach ceann de na príomhsheirbhísí agus na príomhfheidhmeanna a chomhlíonann an NTMA.

Freagairt an Phríomhfheidhmeannaigh

Nochtann an NTMA costais riaracháin de réir a cuid oibleagáidí reachtúla. Éilítear leo sin go ndéanfaí nochtadh ar leithligh i gcás ina bhfuil an NTMA ag gníomhú mar ghníomhaire ag aonán corparáideach ar leithligh. Le hAcht an NTMA (Leasú) 2014 athrófar bunús an chaidrimh gníomhaireachta sin agus cuirfear na feidhmeanna sin díreach faoi bhainistiú an NTMA agus a Bhord nua uileghabhálach. Sa chomhthéacs sin, cuirfidh mé an moladh faoi bhráid an Bhoird nua.

